

U vechju e u metrò.

U vechju avia tribulatu tuttu u ghjornu di a so vita
Avia travagliatu bellu bè
E' li si paria
D'avè cumpitu a so faccenda d'omu.

Avia fidatamente ritracciatu ogni ora
Fattu u censu d'ogni seconda ind'u so capu
Ammansatu l'istante in de so membre ;
Ne tinia u ricordu annebiatu cun orgogliu
Ind'a so memoria un pocu vana.

Si ricordava di a luce cruda di quella prima mane
(Sarai un omu, u mo figliolu)
Quand'ellu ci volse allora cù l'altri
Pigliassi u pesu di a vita nant'à e spalle
E' avia fattu quessa anch'ellu, l'avia fatta

- Ma cosa ùn si face quand'ellu si hè giovani ?
Cusì a s'avia aghigliata pè a strada senza stella
E' iniziatu 'ssu longu camminà ind'a bughjura fredda
Prima a pasponi, è pò cun passu sempre più sicuru
A' u ritimu di e radiò e di e televisioni

Chì martellavanu i battiti di u so core.
Avia suitatu a marea sutterraña
Ind'u laberintu duve ognunu si fecia largu
A forza d'eloquenza muta.
S'avia tinutu un pocu d'aria ind'i pulmoni

In attesa di u gran' Mumentu
Quandu si sarebbe usciti da a galleria ;
E' avà, ghjuntu quellu mumentu
Accindia a pippa
Apria, cum'è l'altri, u giornale.

Avia ben' meritatu u rifiatu
E cù un surrisu calmu e rassegnatu
S'adaggiava nant'a a panca frusta
A mezz'avia trà e duie ultime stazioni
Di u ricordu è di a morte. 4-

ANNETTA

